

遂寧新志卷四



遂寧縣志卷四

鄉宦

清

席騰芳 湖北天門縣知縣洊陞監紀同知署陝西龍安府知府

席太守傳

公諱騰芳字震衢號澹逸蜀之小溪人其先世代有聞人登  
崇禎己卯賢書意欲從此干青雲而直上矣無如運際滄桑  
癸未赴會試畢避地楚之房縣甲申冬獻賊屠城族眾與於  
難順治丁亥回籍覩梓里丘墟從前壯心冰消凍釋矣尋沐

恩錄用遺才授天門縣知縣陞監紀同知駐劄木坪旋署陝  
西龍安府知府然終非其志也未幾致仕家居聞同族寵賢  
在秦胞姪宰在滇公色然喜招而歸之使復其所至康熙甲  
寅樹譜碑於大柱國宅俟罹難來歸者得所考據焉公之用  
心亦良苦矣爲文不拘正法不事思索下筆千言立就性豪  
邁人罕識其面其一言一動皆非今人所及與同鄉李公如  
石王公伯佐諸名士相唱酬年老家貧淡如也同宗存齋孝  
齋二人與余言之甚悉故珥筆爲之傳

贈席騰芳之楚

朱 軾

竟陵風景似吾鄉  
邊郭朱橋鎖畫廊  
花引流鶯穿竹巷  
柳搖驚鷺亂蓮塘  
滿樓烟雨吟船泊  
匝岸笙歌酒舍香  
驄馬來時湖畔息  
高山流水宓琴張

其二

砥柱騷壇我尙諳  
狂瀾能挽賴鐘譚  
至今餘響飄江北  
自昔陳風首漢南  
蕭灑每憐王子竹  
風流猶羨戴顓柑  
不妨此外搜羅廣  
好士如君屈指三

李仙根 字子靜  
遂寧人父如石乃前明癸未進士知長洲縣有  
善政民德之蜀亂僑吳訖殯焉從吳人請也母呂氏公八歲

善屬文工書補博士弟子從外祖少司馬東川呂公嘗曰子  
靜氣甚別終成吾家宅相深器之國朝順治甲午登賢書辛  
丑成進士殿試一甲第二授宏文院編修甲辰分考得士十  
有一人丙午地震求言疏五事條畫蜀情形甚悉旋擢司業  
晉秘書院侍讀戊甲安南黎維禧據莫氏高平地莫元清奔  
寓南甯詔擇部院官往飭諭廷臣交舉公命充正使而兵部  
郎武昌楊公貳之公疏維禧遵諭還土元清謹取具覆疏復  
命第恐蠻性貪黠讐隙已深厚利難捨復具狡辨本章應否  
收接作何進止詔許便宜從事賜正一品麒麟服以行冬十

二月發鎮南關已酉正月抵安南至都統司門維禱不出遣  
諭十餘返乃出迎宣讀如禮旣而交人議多梗公草書一通  
首言皇上如天好生視交民猶內地不忍以元清故而輒加  
兵先遣使宣諭開爾國悔咎之路爲黎氏非爲莫氏也中復  
數其臣誤國十罪移諭輔國鄭憶且曰爾家屢世勲慎毋俾  
黎氏覆祀是時維禱幼政柄胥憶持之得書咋舌曰天使語  
是而龍編浪泊間蟄雷數震擊舉國惴伏乃請畫結領元清  
擇便地處之公堅不許曰自明萬厯壬辰莫茂洽敗莫氏支  
屬屯諒山高平新安州乙未兩廣總督遣偵問莫敬恭報願

居高平諒山海東地旋失乃保高平一郡而黎氏後二年丁酉始進金人乞款今七十餘年矣高平固莫氏故地也又奚容擇便地往返閱三月交人詞屈議始合卒令維禕盡還高平地暨戶口一如勅書指又諭元清謹守疆圉無再啟釁交南大定歸途纂使事紀畧會聞祭酒之命詣闕疏進聖祖仁皇帝召問慰勞良久命內院繙繹留覽旋遷侍讀學士充日講官公體臞而修幹吐音如警鶴善敷講嘗講畢傳翼日入禁庭公撰聖學頌並跋書綾以進跋尾言古有起居注記言記事而禮科因請設左右史官得俞旨此國朝起居注所由

昉也公首充職庚戌總裁武會試癸丑充世祖實錄副總裁  
旋協理翰林院事京察詳允副都御史缺內傳李仙根有骨  
氣可用以例不符止旋擢內閣學士善持議毗贊廟謨爲多  
甲寅持差協理大兵糧餉兼驛傳撫民事務駐荊州昕夕擘  
畫經費充用以事鐫調徜徉吳中久之己未補鴻臚卿逾月  
擢左副都御史言事率持大體朝審覆奏堂議參遺漏公曰  
譬之大朝糾失儀他官何與裁奪二人俸而止河督請別項  
銀左都御史疏非是公曰異日以糧艘爲辭若之何且河工  
不覈地里疏駁無益也奏上聖諭給銀如公言庚申擢戶部

侍郎督理錢法仍充經筵講官部例權關莅任日收銅限八月解庫公特寬逾限日題參題覆無滋擾也且關有遠近奈何以例限之滇黔定案公立請分別族系省查解釋無辜它如四川增茶鹽引解銅經繇地稱驗具結潼關稅務增部員胥力言不可至改折河南漕米減臨清關銅價萬兩豁免靈寶捏壅糧公力主畫題皆獲允壬戌以議錢法投劾去戊辰補光祿寺少卿庚午春正月祈穀例代卿捧槃少卑以失儀鐫級宴如也日書徑二尺字觀者驚爲神三月二日卒年七十有游野浮生集奏疏碑記雜文胥藏於家公通曉事務在

翰林曰蜀招民贏三百例即陞公札省藩曰目前虛名轉瞬  
實課恐病民并病官矣齊豫耿賈二撫覆車可鑒也部議又  
准關東例招百家以知縣用公曰關東招圈內失業民充應  
募數旋以多捏報而止今陝楚州縣胥用丁口考最此靳招  
民彼甘棄民乎惟勤撫子遺則民且不俟招而集後竟無應  
例者在內閣時議興化公曰崇實爲要不然滋擾也德音  
免蘇松明歲半稅或疏并免佃租半公議曰隸農雖貧無科  
索之擾業田者輸正供辨雜徭累負滋甚至佃租率緣旱診  
免奚事脇之且政宜杜漸半租令下恐不至全逋不止訴訟

自此滋繁矣高陽李公得公議入告乃寢庚申翦滅滇孽安  
南奏貢期例三年自三叛連衡思明欽州蒙自貢道胥阻綿  
歷六年今天威遐播逆豎削平請遵貢期如彝典內索使事  
紀畧覽之曰畢竟是向來措置得宜令彼一心嚮服欽惟聖  
祖天縱神睿識洞埳埳而惓惓交南事若此然則公雖旋起  
旋挫不究厥用而才猷卓著所以達主知而膺天眷者深矣  
故至今追數景陵初內外大臣偉畧雄辨特出者輒曰李子  
靜公四子奕振奕據奕登奕撰奕據曾任武昌通判

論曰予與李公同籍公雖留殯吳而嘗從公於朝獲聞

行事今敘其畧彌企典型豈東山涪江秀傑蟠積之氣  
雅有獨鍾者耶昔明平交趾設府十五直隸州五黎利  
叛盡割畀之終明世班外藩國朝統御安守臣節久而  
彌篤非使臣勤宣上德有以懾服其心者乎嗚呼孔子  
所謂專對而不辱命者其公之謂與

季秋王公武約遊上方山

二十年前望落霞如今重到似還家  
半山紅日迎人出一徑清烟傍馬斜  
鴉勢遠盤孤塔影漁歌長應轉帆  
撾偶然興會

闕題

西苑門前度彩舫  
龍池烟水漲冥冥  
碧山故繞承光殿  
綠樹新藏寶月亭

王新命 字純嘏其先楚之麻城人明初遷居縣之下八里胡王  
場曾祖光祖移住潼川北街祖彌父干城崇禎甲申新命年  
十二其冬張獻忠陷潼川家屬七十餘口咸遇害新命被虜  
旬餘逃至文昌廟匿神座下土穴賊至大索了如不見夜走  
南鄉山莊得免適干城南旋獲聚首甫匝月干城復沒於亂  
新命東奔西避歷二歲至順治四年大兵入蜀又遭族叔基

城之難逮下保寧獄沒於旗主曹公歿馬夫人令攻書爲立  
戶十三年入城均授筆帖式十七年官中書舍人厯十載遷  
柏府都事進車駕司員外郎調職方司管機密其年奉命隨  
行少宗伯折某掌院學士傅某出使雲南十月五日抵滇宣  
旨畢新命見吳三桂禮過恭以叵側白二公十一月二十夜  
三桂果變平旦聞者以告新命卽詣二公言我輩此來人皆  
知有此變今事已至此惟以死報朝廷甫朝食三桂差侍衛  
賚茶至新命照常出迎遙望門外甲冑森列侍衛云三桂問  
起居詭言昨宵兵變恐有疏失特令夏國相帶領精兵以衛

其毋畏新命笑曰王乃朝廷親王旣云兵變善爲安輯何必  
爲我輩慮凡事有可畏則畏無可畏則不畏今有何可畏而  
云無畏由是羈於滇者又旬日時新命自分必死旣而竟獲  
生還仍掌機務當吳逆變起倉卒滇黔旣沒西蜀亦陷已而  
耿精忠反於閩王輔臣叛於秦陝之蘭鞏漢興及江右之撫  
建廣饒江南之徽郡相繼陷沒他如陝之平涼天水楚之鄖  
均襄荆岳陽洞庭在在相持至江右之袁臨南瑞都爲盜藪  
吉安則爲賊踞南贛亦隔絕未幾耿逆度仙霞直犯衢州溫  
處臺紹金嚴處處蜂起軍書絡繹羽檄交馳而新命目覩手

披耳聽口授咸中機宜迨任刑部郎中則屢恤大獄任江石  
藩司則疏蠲積逋於巡撫湖北任則請寬鄂郡叛軍之重典  
與請黔省運糧之楚民尤屬仁厚存心後厯河道總督其任  
湖北巡撫時嘗自叙幼時顛沛與壯時遭際於武昌官舍云  
按新命生平事蹟及邱墓坊表見於三臺者甚詳故郡  
志縣志悉載三臺人今按遂志其先遷蜀原住遂寧後  
復移居郡北其發源自有所始故與三臺並見俾無數  
典忘祖之意云爾

朱衣點  
字玉修江蘇崇明縣知縣